

# XI Premio

# Antón Risco de Novela Curta



A Fundación Vicente Risco, Deputación de Ourense e Pastelería Fina Rei convocan conxuntamente o «XI Premio Antón Risco» de novela curta co fin de homenaxear o escritor e teórico da literatura alaricano Antón Martínez-Risco Fernández. Continuator do gusto do seu pai polo fantástico, don Vicente Risco (a quen podemos considerar introdutor do xénero fantástico na literatura galega coa obra *Do caso que lle aconteceu ao Dr. Alveiros*, en 1919), Antón Risco foi un profundo teórico da literatura fantástica con obras como *Serpentáguila (Notas de un lector de poesía)*, Quebec (Canadá), Ediciones Hipogrifo, 1986; *Literatura fantástica de lingua española (Teoría y aplicaciones)*, Madrid, Taurus, 1987; *Viaxes á América Latina á procura de literatura fantástica*. Sada (A Coruña), Edicións do Castro, 1987. Cabe destacar o seu labor de editor en *Antoloxía da literatura fantástica en lingua galega*, Vigo, Galaxia, 1991. Tamén foi un prolífico escritor de novelas e relatos fantásticos, moitos deles aínda inéditos.

Por tal motivo, e co fin de continuar o seu labor de divulgar a creación orixinal, con especial énfase na de xénero fantástico, convócase este premio conforme as seguintes **BASES**:

**PRIMEIRA:** Poderá concorrer calquera persoa que o desexe cunha novela curta escrita en lingua galega ou portuguesa.

**SEGUNDA:** As novelas presentadas deberán ser anónimas, inéditas en todas as linguas e formatos (tanto impreso como dixital), e non ter sido publicadas ou premiadas (en todo ou en parte) con anterioridade.

A obra deberá ter unha extensión mínima de 60 páxinas e máxima de 100 páxinas, conter, cando menos, 25 liñas por páxina e estar escrita a espazo 1'5, en letra Arial, tamaño 12. Na última páxina anexa deberase facer constar o número total de caracteres con espazos do orixinal.

Calquera orixinal entregado sen cumprir todos os requisitos de forma (tipo e corpo de letra, espaciado...) será automaticamente descartado.

**TERCEIRA:** O prazo de entrega remata o día 15 de febreiro de 2026. Os orixinais deberán ser remitidos á FUNDACIÓN VICENTE RISCO, RÚA SAN LOURENZO 3, CP 32.660 ALLARIZ, (apartado de Correos 21-Allariz) por correo postal CERTIFICADO, sen que consten no exterior elementos de identificación da autora ou autor.

**CUARTA:** Os orixinais presentaranse en formato impreso por quintuplicado ou ben en PDF gravados en calquera soporte físico (pendrive ou calquera outro análogo, excluído o CD e o DVD).

Os orixinais irán acompañados dun sobre fechado que conterá a identidade do/a autor/a (nome completo, enderezo postal, teléfono e correo electrónico) e o título definitivo da súa obra, así como unha declaración xurada asinada polo/a autor/a en que declare a súa autoría, así como o seu carácter inédito, facendo constar no exterior só o título ou lema da mesma.

**QUINTA:** A obra gañadora será premiada con 3.000,00 €, así como a publicación do libro. O premio está suxeito á normativa

fiscal vixente, sendo por conta da persoa premiada o pagamento dos impostos que lle puideran corresponder.

A FUNDACIÓN VICENTE RISCO, a través do seu selo editorial DR. ALVEIROS, será a encargada da súa edición e publicación podendo establecer acordos con algunha editora portuguesa, co fin de facilitar a súa difusión, no suposto de que a obra gañadora estea escrita en portugués.

**SEXTA:** O xurado estará composto por cinco persoas. Unha delas fará as funcións de secretaria ou ben a organización designará outra que as faga. Neste último caso, non terá voz nin voto.

**SÉTIMA:** Se a calidade literaria das obras non fose estimábel, segundo o criterio do xurado, este poderá declarar o premio deserto. A súa decisión será inapelábel.

**OITAVA:** A contía do premio inclúe a adquisición dos dereitos de autoría, polo que as entidades organizadoras se reservan o dereito de publicación da obra gañadora en lingua galega e portuguesa. Estes dereitos correspóndenlle en exclusiva á Fundación Vicente Risco. A persoa premiada recibirá gratuitamente 25 exemplares da obra publicada e na adquisición doutros exemplares contará cun desconto do 50%.

**NONA:** Os orixinais que non resulten premiados serán destruídos.

**DÉCIMA:** O fallo do xurado terá lugar en Allariz, na sede da Fundación Vicente Risco, durante o mes de maio de 2026, e será publicada nas redes sociais da FVR (Facebook, Twitter e Instagram).

**DÉCIMO PRIMEIRA:** A participación neste premio leva de seu a aceptación das presentes bases, así como a decisión do xurado, que será inapelábel.